

Uunga siunnersuut: Illulortiternernut aningaasalersuineq pillugu Inatsisartut inatsisaata allanngortinneqarnera pillugu Inatsisartut inatsisaat (Radoneqassutsimik annikillisaanissamut taarsigassarsisitsineq tapiissuteqarnerlu)

(Ineqarnermut Attaveqaasersuutinullu Naalackersuisoq)

Oqaaseqaat:

Siumup anguniarpaa nunatsinni innuttaasut tamarmik peqqinnartumik angerlarsimaffeqarnissaat, taamaammallu Illulortiternernut aningaasalersuisarnek pillugu Inatsisartut inatsisaata allanngortinnissaanut siunnersuut manna Siumumiit tapersiissuteqarfigissavarput, tamannalumi aamma siorna ukiakkut Inatsisartuni aalajangiiffigisassatut oqallisigineqaqqaarmat qularnaatsumik ersersereernikuullutigu.

Naak radoni pinngoqqaataalluni pinngortitamilu pissusissamisoortutut nassaasaagaluartoq angerlarsimaffinnut amerlasuunut kingunerluuteqartitsisinnaanera ilisimaneqarpoq. Radoni *gas*-iugami nunap ataaniit quppatigut aniasarpoq, taamaalillunilu illunut inissianullu isaanissaa minnerusumik annerusumilluunniit aalleqqutaasinnaalluni. Radoni illuni inissianiluunniit silaannarmat sanilliullugu annertunerusumik nassaassaasarnera pissutissaqalersitsivoq angerlarsimaffinni illersuutilersuinissaq anguniarlugu aningaasalersuariaatsitigut nalorninaatsumik inissisimanissaq, inuimmi peqqissusaannut kingunerluuteqarsinnaanera aarleqqutigineqarsinnaammat.

Siumumiit siunnersuut manna Sanaartornermut ataatsimiititaliami sukumiisumik suliarineqarnissaa innersuussutigaarput, Siumumimi pingaartipparput suliniutit inuit peqqissusaannut ingalassimatitsisinnaasut suulluunniit pingaartinneqartariaqartut, taamaaliornikkut angerlarsimaffiit peqqinnarnerusut amerlanerpaat qulakkeerneqarsinnaammata.

Naggataatigut aammaarluta Naalackersuisunut kaammattuutigissavarput Illulortiternernut aningaasalersuariaatsit innuttaasunit annikitsuinnarmik ilisimaneqartut qaammarsaassutigilluarnissaat anguniarlugu suliniuteqartuartaqartut, taamaaliornikkut innuttaasut amerlanerit peqqinnarnerusunik pitsaanerusunillu angerlarsimaffeqarnissaat qulakkiissagatsigu.

Siumumiit taamatut naatsumik oqaaseqarluta Naalackersuisut Illulortiternernut aningaasalersuineq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuutaat tapersiuteqarfigaarput Sanaartornermullu ataatsimiititaliamut ingerlateqqillutigu.

Anders Olsen, Siumut.